

**Regional News Unit AIR Aizawl
Monday, February 10, 2025**

Time - 7:30 -7:40Hrs

REGIONAL NEWS BULLETIN

HEADLINES (MORNING)

- **Naktip zing dar 7 atanga Village Council (VC) leh Local Council (LC) inthlan vote thlak tan a nih dawn avangin vawiin tlai lam dar 4 atangin vote zawn khap a ni ang.**
- **Nilaini hian Chief Executive Member Pu C. Lalmuanthanga kaihhruai LADC-a Congress leh MNF sorkar intawm chu fiah a ni dawn.**
- **Manipur Chief Minister N Biren Singh chu nimin khan a bang.**
- **Prime Minister Narendra Modia chuan vawiin chawhma dar 11 atangin zirlai naupangte nena inkawmna hun Pariksha Pe Charcha programme a hmang dawn.**

<><><>

SILENT PERIOD

Naktip zing dar 7 atanga Village Council (VC) leh Local Council (LC) inthlan vote thlak tan a nih dawn avangin vawiin tlai lam dar 4 atangin vote zawn khap a ni dawn.

State election commission atanga thudawn danin State Election Commission emaw District Election Officer (DEO)-te'n emaw phalna an pe a nih loh chuan, mi tumahin inthlan kaihnawih thil Television-ah emaw Print Media/Social Media-ah emaw mipui hmuh theih turin an phochhuak tur a ni lova. He thupek zawm lote chu kum hnih thleng lungin tantir emaw lei chawitir emaw, a pahniha hrem theih an ni. Vawiin tlai dar 4 hma-in political party hrang hrangte chuan vote zawnga beihpui thlak an khar ang.

Mizorama district 9 (autonomous district council awmna tiam lo)-ah hian VC 544 awmin bial 2,416 a awm a. Bial 1,803 te hi tu pawhin chuh theih a nih lai-in bial 613 hi hmeichhe tana hauh bik a ni. Bial 2,416 chuh tura hming pelut hi mi 6,829 awmin candidate 5,178 te chuan tu pawhin a a chuh theih bial an chuh a, hmeichhe tana hauh bik bial chuhtu hi mi 1,651 an ni.

Aizawl Municipal Corporation (AMC) huam chhungah hian LC 87 awmin bial/member 575 a awm a, bial 418 chu duh duh chuh theih niin bial 157 chu hmeichhe tana hauh bik a ni. AMC huam chhunga LC inthlan chuhtu hi general seat-ah mi 1,211 leh hmeichhe tana hauh bik chuthu mi 448 an awm a ni.

Lunglei Municipal Council (LMC) huam chhunga LC 24-ah hian bial 148 awmin mitin chuh theih bial 110 leh hmeichhe tana hauh bik bial 38 a awm a. Mitin chuh theih bialah candidate 309 awmin hmeichhe bial bik chuhtu 108 an awm bawk a. LMC hnuaia LC te hi an inthlan hmasakna ber tur a ni.

<><><>

ASSEMBLY

Tun thla ni 19 atanga tan tur Assembly inkhawm (budget session) atan tun thlengin sorkar atangin dan siam tura duan (bill) pahnih a lut tawh.

Assembly secretariat atanga thu dawn danin dan siam tura duan hi Labour, Employment, Skill Development & Entrepreneurship (LESDE) leh Urban development & Poverty Allevation (UD&PA) atangin pakhat ve ve a lut tawh a. Zawhna hi House chhunga chhan chi (starred question) 317 leh ziaka chhan chi (unstarred question) 35 a lut tawh bawk. Sorkar hian dan siam tura duan engzat nge putluh tur an neih tih hriat theih a la ni lo chungin lut belh tura beisei zingah Mizoram state university bill a tel niin Akashvani Aizawl chuan thu a dawng a. House dawhkana dah tur lehkhaw pawimawh 5 lut tawhin resolution tur 1 a lut tawh bawk a ni.

Tun tum assembly inkhawmah hian Prime Minister hlui Dr. Manmohan Singh sunna hun buatsaih a ni ang.

Puan tawh angin tun tum Mizoram assembly inkhawmah hian March ni 4 khian finance changtu chief minister Pu Lalduhoma chuan tangka kum thar (2025-2026) atana Mizoram sum hman tur ruahman (annual budget) chu a pharh ang a. Hei hi budget a wawi 2 pharhna tur a ni a, tun tangka kum kallai hi sum harsatna avangin insawhngheh kum (year of consolidation)-ah ZPM sorkar chuan a puang a. Hmalakna lian tham kalpui an tum lo sa a. Kumin budget-ah hian ZPM-in inthlan hma a an lo intiam angte tihpuitlin theihna tur budget danglam hmuh beisei a ni.

March ni 20 thleng assembly inkhawm hi kal chho tura ruahman niin hemi chhung hian tangka tum thar sum ruahman hi pawm hman tura ruahman a ni. Assembly inkhawm tan ni, February ni 19 hian larsap General Vijay Kumar Singh chuan kum khata assembly inkhawm hmasa ber a nih avangin dan pangngai angin Assembly chhungah thu a sawi ang.



LADC POLITICS

Lai Autonomous District Council (LADC)-ah ZPM-in sorkar ding lai lehthal thei dawn a a lan avangin tunkar Nilaini hian Chief Executive Member Pu C. Lalmuanthanga kaihhruai Congress leh MNF sorkar intawm chu thlawptu a ngah tawk em tih fiah a ni dawn.

Larsap Gen. Vijay Kumar Singh remtihna-in District Council & Minority Affairs department Secretary Pi Sangchhin Chinzah chuan LADC chairman Pu V.L. Hmuaka hnenah lehkhaw thawnin Nilaini, February ni 12 khian sorkar dinglai buk tura LADC inkhawm hmanhmawh ko turin a ngen a ni. Pi Sangchhin Chinzah chuan sorkar dinglai buk a nih hma chuan sorkar hnathawk lak leh sawn lo turin LADC sorkar chu a hriattir bawk.

Lawngtlai atanga thudawn danin a hma lam khan MNF MDC 12 leh Congress MDC neih chhun Pu C. Lalmuanthanga te chuan CEM atana ruat Pu C. Lalmuanthanga kaihhruai-in MDC 25 awmna LADC-ah hian nikum May ni 14 khan sorkarna an siam a. May ni 17 khan Council inkhawmah finfiahna a paltlang a. ZPM chuan MDC 10 nei-in tun hnai khan BJP MDC awm chhun Pu T. Zakunga chuan ZPM hi a zawm a. A hnu lawkah MNF MDC pahnih - CEM hlui Pu V. Zirsanga leh Pu Lallawmsanga Apeto te'n ZPM an thlawp leh tak bawk avangin ZPM hian thlawptu MDC 13 nei a inchhalin sorkarna siam an tum ta a ni.

Hemi hma hian LADC-ah hian rei tak sorkarna awm mumal thei lova a awm avangin thla khat leh a chanve zet chu Larsap awpna hnuai (governor's rule)-ah awmin Lawngtlai District Bawrhsapin Llarsap aiawhin sorkarna a keng a. Chumi hnu-ah MNF leh Congress-in sorkar intawm an siam thei na a, kum 1 pawh a tlin hma-in paihthlak theih dinhmunah a ding leh ta a ni. December ni 4, 2020 a LADC inthlanah khan MNF chuan seat awm zawng zawng 25-a 20 la-in hneh takin sorkarna an siam a, Pu V. Zirsanga chu CEM atan thlan a ni. Mahse, Pu V. Zirsanga hi nikum January ni 22 khan Aizawl a Special Court (Prevention of Corruption) chuan eiruk thubuui-ah thiam loh chantirin kum 4 jail a tang tur leh cheng nuai 4 chawi turin a hrem a. Hemi atang hian LADC politics hi a chiri chho ta a ni.

<><><>

CANCER

Mizorama mihring thih chhan tam ber chu cancer a la ni reng a, kum 6 chhungin cancer avangin mi 6,745 an thi.

Health & family welfare hnuai a National Programme for Prevention & Control of Cancer, Diabetes, Cardiovascular Diseases & Stroke (NPCDCS) hotute'n an sawi danin kum 2018 atanga kum 2023 thleng khan Mizoramah cancer vangin mi 6,745 an thi a. Mizorama cancer natna tam chhan hi nunphung tha lo, a bikin vaihlo leh a kaihnawih khawih an tam vang niin an sawi. An sawi danin kum 2018 khan cancer vangin mi 995 an thi a, kum 2019-ah mi 1,081 an thi a, kum 2020 khan mi 1,100 an thi. Kum 2021 khan mi 1,138 an thi a, mkum 2022 khan mi 1,131 thi-in kum 2023 khan mi 1,300 vel an thi bawk a. Nikuma thi zat hi hriat chian theih a la nih loh thu an sawi.

Kum 2018 leh 2023 inkar chhung vek hian Mizoram State Cancer Institute (MSCI)-ah cancer vei mi 11,569 an inziak lut tawh niin MSCI Director Dr. Jerry L. Pautu chuan a sawi a. Kum 2023 kha hemi kum 6 chhunga cancer vei inziak lut tam ber kum a ni a, mi 2,100 an inziak lut a ni. Kum 2022 khan dawtin mi 2,071 an inziak lut a, kum 2021 khan mi 2,13 chhinchhiah an ni bawk. Kum 2018 khan cancer vei thar mi 1,770 chu MSCI-ah chhinchhiah an ni a, kum 2019-ah mi 1,767, leh kum 2020-ah mi 1,848 ziahluh an ni bawk. Dr. Jerry chuan kum tinin cancer vanga thi hi an pung reng chungin inenkawl na tha leh changkang hman a nih chhoh zel avangin cancer veite hi tun hma ngaihtuah chuan an dam rei tawh hle niin a sawi a. Kum khata cancer vanga thi an tam rual hian tam tak chu kum rei tak lo vei tawhte an nih thu a sawi a. Cancer vei hmuhchhuah hma pawimawhna sawiin enkawl dam a awlsam bik a ni a ti a, helama tanlak nasat a ngai a a hriat thu a sawi bawk.

MSCI-ah hian February ni 4, 1998 khan cancer hemna khawl 'cobalt therapy unit' bun a ni a. Hma sawn chho zelin nikum February ni 4 khan MSCI chu Tertiary Care Cancer Centre (TCCC)-ah hlankai a ni a. Japan international Cooperation Agency (JICA) sum cheng vaibelchhe 732 hmanga nasa taka thuam that a ni bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.



MANIPUR CM

Manipur Chief Minister N Biren Singh chu nimin khan a bang. N Biren Singh hian Governor Ajay Kumar Bhalla hnenah banna lehkha hi a thehltut a. Kum 2017 atangin BJP sawrkar hi a kaihruai a. State chhung politics inlumlet nasa bakah party chhunga buaina neuh neuh a awm hnuah banna hi a thehltut ta nia thudawn a ni. N Biren Singh-a hian party hruaitu leh Union Home Minister Amit Shah nen New Delhi-a an inhmuh hnuah nimin khan Imphal-ah a let leh a. BJP Lok Sabha MP leh BJP North-east Incharge- Sambit Patra chuan a tawiawm a ni.



PPCH

Prime Minister Narendra Modia chuan vawiin chawhma dar 11 atangin zirlai naupangte nena inkawmna hun Pariksha Pe Charcha programme a hmang dawn a. He hunah hian zirlai naupang bakah nu leh pa leh zirtirtute pawh an tel dawn a. Exam inbuatsaihna, rilru hahna leh mimal hmasawn zelna turte a sawipui dawn a. He programme hi Akashvani, Doordarshan, PMO Youtube Channel leh Union Education leh Information and Broadcasting Ministry social media channel ah te tihchhuah a ni ang.

Kan corr report i lo ngaithla ang u

